

TREMENDO AMBIENTE DEN ESSO CLUB DESPUES DI TIRO

Cu animacion musical di Doble Sabor y Musical Time.

Aña nobo despues di tiro tabata tin un tremendo fiesta bailable den ESSO CLUB. DEN AMBIENTE tabata invitado di Papito y su Doble Sabor y tambe mester gradici e dinamico director di Esso Club sr. Ovi Croes pa DEN AMBIENTE por a cubri e tradicional fiesta considera como e mihor den Caribe.

Ta un tradicion di e prestigioso club aki pa hopi aña caba ta organisa e fiesta di despues di tiro pa su miembronan y invitadonan. Ta masha hopi hende mes ta interesa pa habri nan aña nobo den e club aki. E motibo ta pasobra e club aki ta hopi priva y bo ta sinti bo berdadera mente den un ambiente di aña nobo. Tambe den e club aki bo ta haña un servicio optimal cu ta Esso Club so por brinda bo.

E pista di baile ta comodo y ta aire liber cu un brisa fresco di laman. Mientras Papito y su Doble Sabor cu Musical Time tabata bataya cu otro treciendo un ambiente musical nunca visto cu a

laga e bailadornan goza sin fin. Pa cera e tremendo fiesta aki cu broche de oro, na salida di e prome rayo di solo di aña '92, mas o menos for di 6or te cu 8or di mainta e dos banda nan aki a combina cu otro cambiando di musiconan constant, y a logra di mantene e bailadornan riba pista.

Durante e dos ora nonstop musical aki nan a habri cu nos tradicional Dande caminda DEN AMBIENTE tambe a canta Dande pa prome biaha y a duna su mensahe pa tur nos artistanan local, sigui cu Tatoo su roadmarch y cu un potpourri di tur e hitnan di carnaval hincando e bailadornan den un tremendo ambiente carnavalesco.

Na final Papito a dal su hit Manolo y a pone tur hende hisa man y sak abao pidi pordon pa tur nan maldadnan di aña bieu, pa asina termina e fiesta inolvidable aki, y asina cuminsa un aña yen di AMBIENTE !!!

